



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

**Pearl tepsetba ken o nung aija alisang
Pak Govt safe house-i belener ao**

TAPAK 3

**Meghalaya nung Congress
MLA David Nongrum asü**

VOL. XVIII NO. 110 (ADOK 110) DIMAPUR

RASEMNÜ (WEDNESDAY) TSÜKLAI (FEBRUARY) 03, 2021

₹ 5.00

COVID Nagaland: Nisung 12,101 dak putetogo

Kohima, February 2 (TYO): Mongulbarnü Nagaland nung nisung 2 dak COVID-19 aliba putet aser tena züngsema nisung ajak agi 12,101 kümogo. Tang parnok 55 anepaludar.

Tanü Dimapur nung nisung ana dak COVID-19 alibaji putet. Külen nisung 11,810 tashi taneptsü nguogo, ta Health & Family Welfare Director, Dr. Denis Hangsing-i ashi.

Nagaland nung COVID-19 aliba puteter nisung 88 süogo aser 148 tanga state temi ogo, ta paisa

metetdaksü.

Nisung 12,101 rongnung Traced Contacts 4,995, armed forces personnel 4,672, tanga state tem nungi arur 1,861 aser Frontline Workers 573 lir, ta paisa ashi.

Tang anepalurtem rongnung nisung 7 dak shirangba yimya terara lir aser 46 dakbo shirangba yimya mali, ta Dr Hangsing-isa metetdaksü.

Tang tashi nung Nagaland nung COVID-19 alitsü akok ta temolung melemi bilemba sample 1,25,210 tendangogo.

NLA session nung RIIN Act yanglutsü nenshir

Dimapur, February 2 (TYO): February 12, 2021 nungi Nagaland Legislative Assembly indang Winter Session agidang state sorkari RIIN ya Act ka ama yanglutsü imlar, ta Joint Committee for Prevention of Illegal Immigrants (JCPI)-i Nagaland Chief Minister dang shidi ka zülüogo.

Nagaland state nung indigenous Inhabitant zülüoktsübaçi sensotem atema kanga dang tongtipang mapa ka lir. Iba ajanga senso shia jangjatsü aser yamaji pamoki tajangzük balala angutsü. BERF Act 1873/ILP aser RIIN ya mesüktepa lir anungji anaprong nung cut-off year ji 1-12-

1963 dang asütsüla, ta JCPI-isa metetdaksü.

RIIN atema Banou'er Commission report indang official copy ka tang tashi JCPI ket matong lir. Iba atema February 24, 2020 nü shidi ka zülüogo saka Covid wara ajuruba ajanga iba dak sendakba maparen kecha meinyaktet. Anungji temalen shia aliba cut off year medeni RIIN Act meyanglura, JCPI-i özüngi melaba ama Nagaland state nung lungkak aitba sentongtem ayonga agitsü, ta Convenor Atomi Swu aser Secretary Tia Longchar nati shidi nungsa metetdaksüogo.

NH 29 nung lung anenzüka aludang nisung 3 yiru



Mongulbarnü NH-29 nung lung anenzüka aluba lendong nung gari ka anenbanga aliba nungi nisung kümzüksü yaritepdang agiba noksa angur. (Dimapur, February 2)

Dimapur, February 2 (TYO): National Highway 29 nung four-lane yangluba tesem ka nung Mongulbarnü lung anenzüka aludang nisung 3 yiru aser gari pezü raksago.

Iba lendong ya tanep Chumukedima police Check post aser New Chumukedima yimsüing tsüingda atalok, ta police-i ashi.

"Iba lendong nung tetsür ka aser tebur ana yiru aser pamok ajak mozü kidangi anir oa anepaludar. Par asemprong temang tajungba lir," ta Additional Deputy Commissioner & Dimapur Police PRO, T Relo Aye-i ashi.

Osang angazükba agi, lung anenzüka aludang gari ana anenbang aser ka tera raksatsü.

Lendong atalokba sülen yariteptsü adenshirtemi anenbangba gari ka nungi nisung ana anitet aser mozü kidanga anir ao ta osang ajangasa ashi.

Dimapur Police-i Twitter nung police check gate nungi TL Park area

tashi lenmang shibangba metetdaksüogo.

Külen, Dimapur Deputy Commissioner, Rajesh Soundararajan, IAS-ia tanga osang ka magütsü tashi Chathe river bridge nungi Kukidolong tashi lenmang shibangba metetdaksüogo.

Chumukedima police check-post aser New Chumukedima village tsüingda lung anenzüka aluba ajanga lenmang shibanger. Iba tenokdangba ya nisung taküm samaba, yiruyibongba aser rongsen akoksaba nungi kümzüka alitsü atema agütsür, ta Rajesh Soundararajan-i ashi.

Iba tenokdangba mapang Dimapur aser Kohima tsüingda senzüba gari tilatemi 7th Mile-New DC Court-Shokhuvi-Razaphe-Mhaikam-Pimla-Mhainamtsi-Jhornapani/Mediphema ajanga senzütsü akok ta Dimapur DC-isa metetdaksü.

NH-29 nung four-lane mapa inyakba ajanga mapang shia lung anenzüka aluba lendong ataloker.

Naga National Council tenzüker küm 75 ajungba benjung among



Chedema nung NNC küm 75 buba benjung amongdang NNC tir Adinno Phizo aser tangartem agiba noksa ka angur. (Kohima, February 2)

Chedema, February 2 (TYO): Mongulbarnü Chedema Peace Camp nung Naga National Council (NNC) tenzüker küm 75 ajungba benjung ayongzüka mongogo.

Naga National Council (NNC) ya 1946 nung tenzük taküm küm 75 abensar. "Mangdang aliba lennirtemi February 2, 1946 nü Lotha region Wokha nung NNC tenzük. Tsüngrem temeim aser taochi atema asenok Pa nem tenüngsang agütsür. Tanü tashi asen linük mesamai aruba atema Pa dang pelar" ta NNC tir Adinno Phizo-i ashi.

Iba sentong nung Adinno Phizo-i NNC souvenir sayatsü aser lennir balala nem senpet agütsü.

"Naga nung aser NNC züngsemtem lir aser Naga nung tasodang nungi NNC züngsem ka akümer. Küm aika India-i tetsükdaksü bentsür aruaka, Naga linük tashitaitba küma aruba atema peladi aser nüma tangdi. Asen linük asoshi taküm bendanga agütsür ajak nem tetushi agütsür" ta Adinno-isa metetdaksü.

British nung yimsüsüba anenba mapang Naga National Council-i August 14, 1947 nü Naga Independence sangoktsü. Iba mapang British yimsüsüba kübok asen ali shilem ka densema liasü. Asenoki Independence sangdongbaji May 16, 1951 nü Naga National Council Plebiscite ajanga talia metentsü, ta laisa ashi.

Ajistiaka, 1952 küm India-i taoba mapang Naga Hills ta ajadaki ballot boxes bener aru saka 1951 küm National Plebiscite nung telangzüba agütsüba ama, iba Indian election nung nisung shingai shilem magi

aser vote ka danga meinoktsü, ta Adinno-isa shisem.

Asen nisung karbo British yimsüsüba kübok liasü saka parnok British nungeri iba tesem toktsür aotsü ta meteta liasü. Tarutsü atema tebilemtsü bena Naga nung tenüng nung nisung 20-i 1929 nung Simon Commission nem memorandum ka agütsü. Iba nung Naga nung British yimsüsüba marudang aliba ama dang alitsü ta shia liasü. Anungji, House of Commons-i Government of India Act of 1935 ajanga Naga Hills ya Excluded Area ka lemtet.

1954 küm India sorkari putiotsü kulitem yutsür Tuensang area-i Army yokba ajanga Indo-Naga tebilemtsü adok. India-i Nagaland timi toktsür aoba ajanga temeten angutsü. Iba ya ajanga South East Asia den international relations puti tasen ka arutsü kechiyong Nagaland ya China aser India tsüingda lir, ta Adinno Phizo-isa metetdaksü.

Asenoki tanü küm 75 ajungba benjung amongdang, taküm bendanga agütsürtem bilemtetdi aser tushidi. Tesüiba küm 75 tashi linük ka ama arudang asen nübortemi tsükchir ket nungi tejashi, timtem aser tayongzükba jenti ajuruogo. Tanü tiyazü aser askhiküla inyakba telok ka lir aser parnok asen Naga loktiliba nung Independence mali küm daksüogo, ta laisa ayongzük.

Asen ochishiba sobaliba beshidi aser asentzü sena asen tepok mesüdi. Iba ajanga tangari asenok akhümtsübuttsü aser Tsüngremia meimtsü, ta Adinno-isa shisem.

"Lanurtemia otsüla-oboula nungertemi bendanga agüja inyakba kodanga mamatsüla. Nür putiotsü metetang aser senmang tetoktsü. Nenoki kolenisa odir, Naga linük atema ambassador ka ama liang aser kechi inyakdir, nendaka inyakang. Nü sobaliba akümtsübuang aser tetsü oshi kodanga tamadok. Tsüngrem tsübuang aser teti Pa dang shisatsü meshiang. Nai kechia meinyak sernung anguba senpettem magizüksüla aser asen linük nung telemsa adokdaksütsü atema inyakba tasatem meteta liang" ta NNC Tir Adinno-isa ayongzük.

"Küm 75 tejakdang Tsüngremi pei pei tesemtem nungi asen lennirtem Lotha Region nung Wokha nung adenshidaksü. Idakji February 2, 1946 nü Naga National organization mezügbuba tenzük aser iba dang Naga National Council (NNC) ta aja" ta Federal Government of Nagaland (FGN) Tir Gen. (Retd) Vivalie Metha-ia o jembidang ashi.

"Tesüiba küm 75 tsüingda asenoki timtem-toushi aser tejashi ajangshia aruogo. Ajistiaka asenoki ajakji ajangteta aruogo aser tanü Naga National Council tenzüker küm 75 ajungba benjung amongdang, linük atema bendanga agütsürtem nem tetushi agütsür. Parnoki bendanga agüja inyakba mapatem asen temolungjang nung teti atema zülüoka lir" ta Mehta-isa metetdaksü.

"Tsüngrem asen kuli ama, asenoki nübor ka, linük ka aser ola ka agi asen taoba lennirtemi senmang yutsüba ama asen nübortem talenba nungi salatsüdi," ta paisa ayongzük.

May 2 nungi UGC NET exams tenzüksü

New Delhi, February 2 (Agencies): India nung Covid-19 tensa dak rangloker May 2 aser 17 tsüingda UGC-NET agitsü.

"University Grants Commission (UGC) tenüng nung NTA-i National Eligibility Test (NET) ketdangsüa agitsü," ta Union Education Minister, Ramesh Pokhriyal Nishank-i Mongulbarnü ashi.

Iba tatidang ya Junior Research Fellowships indang grant atema aser ano Indian university aser college tem nun Assistant Professor inyaksü atema agir.

National Testing Agency (NTA)-i UGC-NET ya shilem ana lemsar agitsü- Anepdang 9:00 ako nungi

anüngdang 12:00 aser nikongdang 3:00 ako nungi nikongdang 6:00 ako tashi.

UGC-NET nung question paper ana alitsü, ka 100 marks aser 50 multiple choice questions aser ka 200 marks and 100 multiple choice questions.

Iba tatidang atema form ji February 2 nungi online nung angutsü aser March 2 tashi nungbo online nung submit asütsüla.

MAY 4 NUNGI CBSE BOARD EXAMSTENZÜKSÜ:

Maneni, Mongulbarnü Education Ministry-i Class X aser XII atema CBSE board exam May 4 nungi tenzüksü osang metetdaksüogo.

Class X tatidang June 7 aser Class XII tatidang June 11 nung atemtsü. Külen, March 1 nungi practical exams tenzüksü.

Class XII tatidangji shilem ana lemsar agitsü. Mezüing shilemji anepdang 10.30 ako nungi nikongdang 1.30 ako aser tanabuba shilemji nikongdang 2.30 ako nungi nikongdang 5.30 ako tashi agitsü. Class X tatidangbo anepdang 10.30 ako nungi nikongdang 1.30 ako tashi agitsü, ta Education Ministry-isa metetdaksü.

Tatidang ajak offline-written mode aser COVID-19 inyakyim kübok agitsü aser July 15 nü results metetdaksütsü, ta parnokisa ashi.

Signify Innovations India Ltd distributor centre Kohima nung lapokogo



Kohima nung February 2 nü Signify Innovations India Ltd distributor centre lapoktsüba mapang Kevichiilie Chadi aser tangartem tangokba noksa nung angur.

Kohima, Tsüklai/February 2 (TYO): Signify Innovations India Ltd distributor centre ka tanü 2nd World War Cemetery anasa R.K. Building, TCP Gate nung lapokogo.

Iba distributor centre koba M/S Engineering Station, Electrical Division, Kohima ta nüngja agütsüogo, iba centre ya Nagaland Electrical Contractors

Union tir Kevichiilie Chadi-i lapoktsü.

Sentong tatsüka agiba mapang Associate Pastor, CRC AG Road, Kohima Daniel Lohe-i bendanga agütsü sarasadem ka ayongzüka agi.

M/S Engineering Station nung Ecolink, Power Cube Original, Power Cube Original Extended, Power Cube USB,

Power Cube USB Extended, HDMI Cable Flat 3m, Car charger USB- C, Tulip Standing, Audio Cube 40W, Power Strip Modular, Moft Mobile Stand amala osettem angutsü.

M/S Engineering Station ya anepdang 8:00 ako nungi nikongtsütsü 5:00 ako tashi lapoktsü.

1buba Online Philatelic Exhibition, NEPEX sentong agi

Dimapur, Tsüklai/February 2 (TYO): Mezüngbuba Regional Level Online Philatelic Exhibition, NEPEX, January 23 nungi 31 tashi kaogo. Iba sentong ya North East Philatelic Society den longjemer Chief Postmaster General, Circle, Shillong-i ayongzüka agi.

Exhibition sentong nung North Eastern state balala nungi kaketshirtemi shilem agi, kong Livingstone Foundation International School, Dimapur, Nagaland nungia kaketshir troki jenjang balala nung shilem tajung agiogo. Parnok Postcard

Miniature Art competition, Speech Writing competition, Quiz, aser stamps amshia Collage Art tetoktepba nung shilem agia liasü.

Tetoktepba nung class 10 nung azünger Gavin Sangma-i Collage Art competition nung tasembuba jenjang angu aser class 11 nung azünger Penyu Longchar-i, Postcard Miniature Art competition nung tasembuba jenjang angu.

Kaketshirtem dak alia lanur aser taintem aikati tetoktepba balala nung shilem agiogo aser Livingstone Chairman, Dr.

Andrew Ahoto Sema-a, North Eastern state balala nungi tanga tetoktepertem den Philatelic exhibition nung shilem agia liasü.

Iba tetoktepba ya World War II Philatelic Vignettes omen nung ajemdaker agi aser pai mark 100 nungi 81 nguteta Vermeil Medal angu. Iba medal ya Open Class category nung tematiba lir, koba Silver aser large Silver medal dang temaba lir. Kasa mapang nung Deccan Philatelic Society Pune-ia pa nem sempet balaka agüja liasü.

Noklak nung road safety seminar agi



Dimapur, Tsüklai/February 2 (TYO): February 1 nü Thang Old Council Hall, Noklak village nung road safety dak sendakba nung seminar ka ayongzüka agiogo. Iba sentong ya 'Sadak Suraksha-Jeevan Raksha' omen nung ajemdaker agi.

Sentong nung Superintendent of Police, Noklak, Dr. Pritpal Kaur, IPS-i, driving - driver, machine aser road & bridges indang arm asem indang rasaa ashi. Laisa, driving license, registration, insurance, emissions test certificate, Gari anishiba mapang mobile amshiba yimya, yi jemer agir aniba aser lokti atema bilema gari anishtsüba indang onüktem benoka jembi.

Transport vehicles dak sendakba nung fitness certificate aser tenüngdakba permit ajak kanga junga anepalutsüla, ta SP-i ashi. Laisa, Sign, Symbols aser traffic rules, tinyaktsü aser minyaktsütem aser IPC aser MV Act kübok aibelenertem merenshtsü shisema aliba indang lemsatop. Kasa mapang nung first aid responses dak sendakba nung maparentem inyaka sayu. Iba sülen Noklak SP-i Frontier Royal Enfield RE enbloc indang Bikers Club rally tenzüksü.

Sentong nungsa TRPO tir, Hangthing aser Frontier Royal Enfield RE enbloc, tir Changkamba Chang natia o tatsütsü jembia liasü.

Maneni ASI S.Phee, Noklak police-i, Motor Vehicle Act indang onük nung aser Project Manager TI project, Noklak, J.Khumong-i, Prophylaxis aser First Aid onük nung ajemdaker jembia liasü.

Iba sentong ya S.I Mongthei, Noklak Police lenisüba kübok agi aser Advisor MDU, Noklak-i lokti pelaa agizükba o jembi.

Kasa anogo 45th Assam Rifles, Noklak-i achaayanga seminar agiba tesem nung gari anishirtem atema angati Medical Camp ka ayongzüka katsüogo.

Iba sentong ya National Road Safety month amungba nüngtem nung Noklak police-i ayongzüka agi.

Chümoukedima Village Council ajanga senden ayonger

Dimapur, Tsüklai/February 02 (TYO): Chümoukedima Village Jurisdiction (Khuova ayong nungi Rüzaphema/Peren arrtsü tashi) kübok NH 129(A) Dimapur-Peren-Imphal two lane lenmang yanglutsü aliba agi kongshiba ali kiburtem den senden ka amentsü, ta Chümoukedima Village Council ajanga sangdong ka nung metetdaksüogo.

Iba project dak sendakba ken o balala aser shia aliba tesem nung kongshiba ali kiburtem den jembishinütsü alinung iba senden ya ayonger. Iba senden nung adentsü atema

tongtipangsa lenmang yanglutsü aliba agi kongshiba ali kiburtem jaoker.

Iba senden nung madenba ali kiburi tarutsü nung Council dangi ashishitepba mesüra tagitarutsü atema benokba kecha magizüksü, ta jangja jangja metetdaksü, ta Chümoukedima Village Council sangdong ajanga ashi.

Iba senden ya Chümoukedima Village Council Auditorium nung February 6, 2021 anepdang 10:00 ako nungi tenzüksü, ta Chümoukedima Village Council chairman, Razouvotuo Chatsu ajanga ashi.

February 6 nü Dimapur DPDB senden amentsü

Dimapur, Tsüklai/February 02 (TYO): Dimapur district indang District Planning & Development Board (DPDB) pur ita shia amenba senden February ita atema Deputy Commissioner indang Conference Hall nung February

6, 2021 anepdang 11:00 ako nung amentsü, ta Deputy Commissioner, Dimapur, Rajesh Soundararajan ajanga sangdong ka nung metetdaksü.

Iba senden nung Dimapur DPDB züngsem ajak medema arua adentsüla, ta paisa ashi.

Dimapur nung COVID-19 atema training tenzüko



Dimapur, Tsüklai/February 02 (TYO): Dimapur district kübok NGOs, NCOs, Home Guards, Civil Defence & SDRF Personnel atema COVID-19 sensitization training ka February 2, 2021 nü District Commandant, Home

Guards, Civil Defence & SDRF Office, Dimapur nung tenzüko. Iba training ya anogo asem agitsü, kong Leprosy Officer, CMO, Office, Dimapur Dr. Hetu Swu Zonal ya shisalen sayur ka ama iba training agitar.

Deputy Commissioner, Peren ajanga gari tulu senzüba nokdang

Dimapur, Tsüklai/February 02 (TYO): Mhaikam nungi Jalukie tashi lenmang tang teyangludak aliba mechi iba lenmang (Mhaikam-Pimla-Mhainamtsi) nung February 1 nungi March 31, 2021 tashi süngbak abenba garitem densema gari tulu senzütsü memelar, ta Deputy Commissioner, Peren,

Sentiwapang Aier, NCS ajanga sangdong ka nung metetdaksü. Lenmang yanglushiba maparen tekeratiba nung renemdaksütsü mechi iba tenokdangba ya agütsü, anungji nübur ajungai iba sangdong nung amalitepa mepetmesü arema atatsü ajungshir, ta sangdong ajangasa ashi.

Tuensang-Noklak district VLE Cooperative Society senden amen

Dimapur, Tsüklai/February 02 (TYO): Nokyan 'B' Village Frontier District Noklak nung Janua

29, 2021 nü VLE Cooperative Society indang 2 buba lokti senden mena liasü.

Iba senden nung Alemnungsang Asst. Manager CSCSPV Nagaland ajanga Common Service Centre indang inyakyim tongmelang agi rateta shia liasü.

Yimtsüngtem nung service

agütsüba atema tongti tesemdang, SP Noklak, Dr. Pritpal Kaur, IPS ajanga VLEs tem dang pelaba lemsatop.

Department-i VLE den külemi LED bulb manufacturing unit amenoktsü atema skill training agütsütsü aser yimtsüng nung zünger mapa mongui aliba lanurtem pei sasa pei poksünga alitsü atema training agütsütsüla, ta lai ayongzü.

Iba sentong nung Mukum, VLE Tuensang menden liasü.

Pelaba Lemsateper

ASÜR WB. L. SANEN AO

21.01.1927 – 26.01.2021



Asür Wb. L. Sanen Ao'er kibongi takoksa tulu ajuruba mapang ozü dang temeim mapa sayurtem aser taochi mapa inyaker ajak dang pelaba metetdaksür.

Kibongtem, medemertem aser temeimertemi nübo, sarasadem aser aria bilemtsüba inyakyim balala ajanga ozü yariba atema kangasa pelar. Nenoki mapang agütsüba aser molungsoa yariba atema pelar ta ashiba agidangbo meperir.

Asüpila sentep sentong nung medentetaka asükhu lemsatepba osang abener ajak dang, nenok sarasadem aser o tajungtem asoshi kanga pelar.

TSÜNGLANGLEN AGÜJA ALIRTEM DANG BALAKA PELABA LEMSATEPER :

1. Dr.S.C. Jamir, Former Governor Goa, Maharashtra and Odisha & Former Chief Minister, Nagaland
2. Shri. Phangyu Phom, Minister, H & FW, Nagaland
3. Shri. Imnatiba Jamir, Advisor, Industries & Commerce, Nagaland
4. Dr Paul Dhinakaran, Chairman, Jesus Calls International
5. Rev. Kilang Jamir, Founder, Youth Harvest Ministry, Dimapur
6. Sathrack Billygraham, Jesus Calls National Prayer Tower, New Delhi.
7. Shri. K. Temjen Jamir, Editor, Tir Yimiyim
8. Akhoya Kosasanger Putu Tatar menden (Akhoya Village Council)
9. Nagaland Civil Service Association (NCSA)
10. Dimapur Ao Baptist Arogo (DABA)
11. Kohima Ao Baptist Arogo (KABA)
12. Akhoya Senso Telongjem, Dimapur
13. Akhoya Senso Telongjem, Kohima
14. Imsonger Telongjem, Kohima
15. Imsonger Telongjem, Dimapur
16. Dimapur Akhoya Imsong Unger Telongjem
17. Dimapur Waromong Senso Telongjem
18. Set Free Ministry, Sovima
19. Dimapur Area Chuchuyimlang Senso Telongjem, Dimapur
20. Nagarjan Ao Senso Telongjem
21. Langpangkong Senso Telongjem Kohima
22. Imsonger- Kidong Telongjem, Akhoya
23. Aoli Imsong Unger Telongjem, Mokokchung
24. The Covenant Family
25. Dimapur Waromongtsur Telongjem
26. Dr. Vicky Katheria, Doctors and staff of Eden Hospital, Dimapur
27. Shiu lights and sound.

Onokisa Dr. Z. Mozhui, MH Hospital, Dimapur aser nurse ajak dang kanga junga anepaluba atema pelaba metetdaksür.

Ozüi kanga pelar ta iba sangdong ajanga metetdaksüba yimlibilema agizükangma. Ozüi takoksa tulu ajuruaka, nenoki taochi sayuba ajanga iba khuret koktetogo.

~ Mrs. Tainla Sanen, Chirnurtem, Semchisemnurtem aser sosem-dangsem ~

Meghalaya nung Congress MLA David Nongrum asü

Shillong, February 2 (Agencies): Meghalaya kübok Mawryngkneng constituency nungi Congress MLA David Nongrum tanep süogo.

David ya arishi küm 42 tain liasü. Pa temolungjang nung timtem adokba sülen asü.

David teku nung tashitsü atua kangshiba sülen North Eastern Indira Gandhi Regional Institute of Health & Medical Sciences (NEIGRIHMS)-i anir ao. Ajisüaka, pa len tom nung asü ta mozü ki ketdangsürtemi ashi.



David Nongrum (File photo)

David ya Mawryngkneng nungi MLA kümsük anaben inyakogo. Pa ya Congress lennir tejen aser taoba Meghalaya speaker Charles Pyngrope'er jabaso liasü.

David ya 2013 küm Meghalaya Legislative Assembly nung mezüing atema independent candidate ka ama takok angu. Iba sülen 2018 küm pa Congress nung aden.

2018 küm David-i Mawryngkneng constituency nungi Congress ticket amer toktepa takok angu.

Assam nung tetsür indang bike rally ka ayongzük

Dibrugarh, February 2 (Agencies): Mongulbarnü Assam District Road Safety Committee, Dibrugarh-i tetsürtem atema bike rally ka ayongzüka agiogo.

32 buba National Road Safety Month nung shilem ka ama iba rally ya road safety indang osang metetdaksütsü

atema ayonga agi. Iba sentong ya January 18 nungi tenzük aser February 17 nü tembangsü.

Mancotta Tea Estate field nungi Dibrugarh MLA Prashanta Phukan aser Dibrugarh SP Prateek Vijay Thube nati iba rally tenzüksü.

Sentong nung District Transport Officer Sanjiv

Hazarika, Rajib Saikia, OC, Dibrugarh Sadar Police station, motor vehicle inspectors, Traffic Inspector Dipjyoti Dadhara aser tanga ketdangsürtem aden.

Mancotta Tea Estate nungi tenzükba sülen Seujpur kübok Tirupati Mandappam nung bike rally tembang.

PM Modi-i Feb 7 nü Dhekiajuli semdangtsü

Guwahati, February 2 (Agencies): Prime Minister Narendra Modi-i February 7 nü Assam kübok Dhekiajuli semdangtsü aser schemes aika tenzüksütsü.

"Prime Minister Narendra Modi-i February 7, 2021 nü Dhekiajuli semdangtsü atema Assam-i yongya atar. Iba maparen atema Biswanath Chariali nung BJP

Karyakarta nung den senden ka menogo" ta finance minister Himanta Biswa Sarma-i ashi.

Prime Minister Modi-i anüngdang 12:00 ako nung Dhekiajuli nung lokti sentong ka nung jembitsü aser online ajanga Biswanath Chariali Medical College aser Chairaideo Medical College maparen tenzüksütsü, ta Minister

Sarma-isa metetdaksüogo.

Iba sentong nungsa PM Modi-i Asom Mala tenzüksütsü.

Minister Sarma-i iba dak sendakba atema Mongulbarnü Biswanath Chariali nung minister Ranjit Dutta, minister Pijush Hazarika, MP Pallab Lochan Das aser BJP züngsemtem den senden ka amen.

Prof SS Singha: MU nung tetsür VC mezüngbuba

Imphal, February 2 (Agencies): Manipur University nung mezüngbuba tetsür Vice-Chancellor inyaksü atema Professor S. Sanatombi Singha shimogo.

La Manipur University nung Department of Manipuri tesayur ka lir.

Deobarnü VC (in-charge) Prof Amar Yumnam mapa nungi sodi anguba sülen Prof

Singha-i Manipur University nung Vice-Chancellor (in-charge) inyaksü tenzükogo.

Prof. S. Sanatombi Singha ya university nung senior-most Professor lir aser lai arishi küm

65 matong tashi mesüra VC tasen ka meshim tashi Vice-Chancellor (in charge)

inyaksü, ta Manipur University nung registrar-i metetdaksü.

Assam Rifles-i Mizoram nung sen aika apu



Aizawl, February 2 (Agencies): Mizoram kübok Champhai district nung Assam Rifles-i India-Myanmar arrtstülen Rs. 80 lakh ngutetogo.

Assam Rifles-i Zokhawthar tesem nung India senji apu aser ibak sendakba nung nisung ka puogo. Osang tejangja ka angazükba sülen Assam Rifles-i Young Mizo Association (YMA) den yaritepa mapaji inyak.



TIR YIMYIM YIMOBILEM (EDITORIAL)

DIMAPUR RASEMNÜ, TSÜKLAI (FEBRUARY) 03, 2021

MERENLOKBA YIMTEN KA

- Tangsen Lemtur

Myanmar linük nung sepaitemi State Counsellor, Aung San Suu Kyi den lenir 20 dak tema apuba sülen sepaitemi linük nung emergency sangdonga küm ka yimsüsütsü lemtetba ya nüburtem asoshi osangtajung ka masü. Myanmar nung küm aika sepaitemi tashi ambangyima amshiba agi iba linük nung yimten merenloker. Myanmar linük temzüng Arrla 417 ajanga emergency mapang nung tashi amshia yimsüsütsü atema sepaitem nem tashi agütsür. Osang angazükba agi, coronavirus wara agi kongshiba den külemi yaküm November ita nung agiba election nung ochimashi tulu liasü ta shia sepaitemi linük nung emergency sangdong. Yaküm November ita nung agiba elections nung Suu Kyi'er party-i House anaprongla senteper menden 476 nungi menden 396 tashi nung takok ngua liasü. Iba sülen February 1, 2021 nü Parliament tenzüksü ghonda ishika dang lia anepdang züngia sepaitemi lenirtem pua emergency sangdong. Küm ka emergency tembangba sülen ang sepaitemi election ayongzüka agitsü, iba sülen takok angurtem nem yimsüsüba menden agütsütsü. Tang Myanmar linük nung telecommunications anenogo; linük yimtiba nung internet aser phone services anentsüogo. Iba dak alia linük tesem aika nung internet services liaka social media accounts aika anentsüogo. Iba tatalokba sülen linük balala, meimchir temeden atema inyakertem aser International organization balalai Myanmar nung democratic inyakim alema inyakba atema aitsüdar. 1962 küm nungi tenzüka Myanmar nung sepaitemi dang yimsü süa aruba sülen 1990 küm yimsüsür shimtsü atema nüburtem nem maongka agüja election ayongzüka agi. Iba election nungji Democracy lenir, Suu Kyi-i aniba National League for Democracy (NLD) teloki menden timba nguteta takok tulu angu saka sepaitemi la nem yimsüsütsü atema tashi magütsüi la 'house arrest' süa küm 15 tashi puoka liasü. Suu Kyi ya Myanmar nung British nung yimsüsüba nungi yimten nüchiso ngutetsang, Gen. Aung San'er jala lir. Suu Kyi-i bendanglen shisaliok jenjang tajung bushiba sülen lai lar limai tanaben meyipa arua yimten nung shilem agitsü mulungtetbaji lai nübur meimba ajanga liasü ta rajemer. 1990 küm election nung Suu Kyi'er teloki menden 485 nungi menden 392 nguteta liasü saka lar telok nem yimsüsütsü atema tashi magütsüi sepaitemi dang yimsü asü; ibaji Myanmar nung democracy meimer ajak anema inyakba mapa ka liasü. Nübur shimetba 'democratic' linük ka nung senso shia nem temeden balala agütsür, ajisüaka Myanmar nung sensotem nem item temeden kecha magütsüi sepaitemi ambangyima inyakba agi Myanmar linük kanga telungi luogo. Tanü ama anogo shia kanga renlokba putu ka nung Myanmar nung sepaitemi nübur shimetba yimten telok nem yimsü mesüdahtsüi nokdangba ajanga tamalen-a US-i anir linük aikati Myanmar den meyaritepi aruogo. Myanmar nung sepai lenirtemi democratic lenirtem tangsa chioka emergency magienra alima linüktemi iba linük meyaritsü aser iba jagi nüburtemsa akoksatsü aser par linük maneni telungi alutsü ta bilemer.

OLEMSABANG TEMULONG ZÜREPER

~ I.ZÜLU PONGEN

Asür Temjen Toy Chief Secretary asüba angashia temulung kanga züreper. Aor aser Naga nung party mebandangi nübur ajak mulungdok ka asüba yabo sasar-a mesasamara nih! Aor shin o nung anjung teneri nung anü iadok ama ta jembiba oji ya adi. Nübur ajak mulung jang mangadokogo nih!! Naga nung nübur ajak meimsang pa ama nübur asoshi litetsang lenir, pa amabo shinga madoktsü-ang südi na ta sasaseta bilemer.

Asü pila sentong nung o tajung ajak shitemogo südi, ano Kohima-i mouteter lokti balala aikati pei alidak mangyim o aika jembia mongogo, tetushi agütsüogo, ya pa dak alang. Sür asangba lima ta ajaki züba-süba jembir, saka tanü yabo jembir mejembima tatalokba aika alitsü, tanü mejembimatsü.

Nia ka bilemteter, taoba ROP revised nung metokmeberi aliba pensioner asoshi pai puteta bener arua tanü tashi inyaka arudarji, pensioner tulurtembo meyi aika talila keter ngudaki aser Arrer lakh tashi angur. Ya shibai amatsüaka? Onok pensioner-ia iba revised pension yabo pa tenüng nung agiogoni. Onokia kodanga mamatoktsüsa temulungjang nung zülüoka ayur. Tarutsü lanur officer tulurtemia pa ama nübur asoshi inyaktettsü imlaa atar. Tsüngremi asür Temjen Toy kibong aser semchisemnur ajak azükarujangma ta sarasademtsür.

SOBALIBAI KHRISTAN TAMANG AKANGSHIDAKTSÜBA

~ Wati Longchar (Serampore)

(Yashi adok nungi...)

Tar nungers otsü	Purapuji otsü, tamangtsü maka ta jendok. Ochi ta magkizüker.	Ochi, putipuyang tarok, wain-shin tangazütsü aika aketba otsü. Tar nungers otsü ajanga kin ka lungjemdaksür, ayak agütsür. Tetsü-tobu senti senmang ta angateta, putu ka nungi kati belentepyonga sayua aru.
Takar	Sen jenti rizünga akaba, ki tulu, senti oset, alu aser oset-tsüset yangludak aika akaba.	Shibai sü achir aser pei akaba ajak yimer nem benjong agütsür, parnok dang takar ta aja.
Meimchir Lokti nung	Kija tama aser iba sülen lokti. Kija ka akaba mesüra ajungketba ajanga lokti ajangzüker, lokti tejakleni aor.	Lokti lirang kija alir. Lokti tama aser iba sülen kija nungdak arur. Lokti ajangzütsü asoshi kijai tenlatsüla.
Tantsü-Tambu	Lokti nung jendoker; akhüm metsübur. Lokti asoshi tejanatsü ka amai old age home nung anir oa yutsür.	Senti, temoatsü aser lungzü. Ajaki akhümtsübur aser yim akhüm ka amai tushir.

Yangi tanü putu tangatetba aser tetsü-tebo sobaliba balala lemdanga sayuba nükjidongji ka tajungba aser ka tamajungba ta sayutsü asoshi masü, saka koda "balala" aji angatettsü atema sayur. Tanü Lai puti ratetba aika temesüng nung sobaliba dak tera yanger züluba angutsü, aser asen nüburtemia tangar sobaliba atsünga ratetba angutsü. Hau, par tesayuba nungji tangazütsü jenti lir aser lokti nung temelenshi aika bener arutsüogo. Saka asen tetsü-tebo sobaliba tangatetbaji amshia Lai ratet nung alima nübur aika tajangzüker ngutettsü aser Khristan tamang tarokba angatettsü. Asen sobaliba dak tera yanger Lai ratetba ajanga alima dang temoatsü jenti bener arutsütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arishi küm 3 tanur tetsür kati alima atema sarasademtsü



Tsüklai/February 02, 2021 (Agencies): Tashidak wara tamajung mechi tanü alima ajunga kangshia aliba mapang arishi küm 3 tetsürchanu kati alima atema sarasademtsüba video ka prokshia nisung million aika molung nung kongshi.

Iba temeımtsü aketba video nung adokla ya Arya lir. Lai alima atema aser talisa coronavirus tashidak agi kongshia alir asoshi temolung agüja sarasademtsüba agi nisung million aika molungjang nung kongshi.

Iba video nung Arya-i terepranger dang la den külemi sarasademtsü ajungshi aser "Tebu

Tsüngrem' dang sarasadem. Iba virus tamajung agi kongshia alir atema lai Tsüngrem dang sarasadem. Laisa timtem ajura aliba aser kinunger adianu asüba asoshi mangyim tia nung alirtem atema sarasademtsü.

"Temeim Oba Tsüngrem, Na onok den lir ta ni meteta lir aser Nai onok sarasadem angar ta ojai ashir. Ni kanga tila lir aser Na mejashidaktsüner, kechiaser tanü ni Nü dang temeim aser kazütsü oset dang tera tali meshitsü. Tanü ni COVID-19 agi kongshia alir atema sarasadem. Shirnoksa süogo aser shirnoksa anünga lir..." ta lai sarasadem.

"Oba Tsüngrem, imlibilema tsürapur takum samar aliba tanurtem nai reprangang... Imlibilema nai parnok meimang aser anema yujang," ta lai ashi.

Arishi küm 3 tanur yagi alima ajunga nung timtemera bilemtet.

"Oba Tsüngrem, imlibilema parnok nem taneptsü agüjang aser yakta tensa tajungba dangi arutsü ta parnok nem metetdakjang," ta lai sarasadem.

Lai ki malir, makamaıter, kibong mesütsü senotsü malir atema sarasademtsü.

Maneni Arya-i coronavirus atema medical frontline nung alirtem asoshia sarasademtsü.

"Doctor tem shirnoki anogoshi takum bendanga agütsür takum kumzüksü atema inyaker, parnok atema sarasademtsür. Shirangertem taneptsü ngudaktsütsü asoshi tanen makai inyakba nurse tem. Mozüki nung inyakterem atema sarasademtsür. Oba Tsüngrem, parnoki mapang angudang chiyongtsü shidak achitsü aser anisüngzüksü nai jembiang," ta lai Tsüngrem dang sarasadem.

Scotland nung arogo lenirtemi sorkar anema ken o benok

Glasgow, Tsüklai/February 02 (Agencies): Scotland nung aliba arogo lenir nisung 27 ajanga Scottish sorkar anema ken o benoka lir aser tashidak wara mechi lockdown totuyuba agütsüba ajanga tekülem ki shibangtsüba asoshi court ajanga reprangshitsüla, ta ashir.

Arogo lenirtemi ashiba agi, lockdown tenokdangba ajanga tekülem agiba tesemtem mapa tamajung inyaker ama kumtsü aser ibai European Convention on Human Rights [Articles 9 and 11] aser Scottish Constitution nung aibelenba lir.

Sorkari totuyuba agütsüba ajanga tekülem kidang nisung adenshia tekülem agiba aser baptiba ya mapa tamajung inyakba rongnung tamajungtiba ka kumtsü, ta Christian Post ajanga ashi.

Scotland nung January 8 nungi tenzüka lockdown totuyuba tasen ka benokba sülen arogo lenir telok

kati January ita tiyonglen Scottish Ministers dangi shiti ka yoka liasü.

"Tekülem agiba tesemtem shibangba ya tim masüba mera ka lir ta Scottish Ministers temi magizük, aser iba ya ajanga tamangba yimsü tsütsü temeden nung timtem tulu agütsür. Tang United Kingdom nung tekülem ki shibangtsüba linükji Scotland ya dang lir aser iba inyakyim ya danga linüktem nung tenokdangba agüja akuba dang nungi khenyongi balaka," ta parnoki zülü.

Iba shiti nung telangzüba agüja, Scottish Ministers ajanga tashidak wara aliba mapang mera balala agütsü tim lir, ta Scottish Government Legal Directorate ajanga ashi.

"Nüburtem anema yutsütsü mechi sorkari arogo tem inyakyim nung talenba agütsütsü lenmang sadema lir. Nübur anema yutsütsü nükjidong nung Scottish Ministers ajanga

telemtetba agütsü temeden lir," ta shiti ajanga ashi.

Tashidak wara aliba mapang nisung aika tsüngtong tekülem kidangi oa Tsüngrem külemtsü nüngdaka lir, ta arogo lenirtemi ashir.

"Tekülem ki lapokba ya miımchir temeden kisüng masü mesüra Scottish constitution indang teinyaktsü kisüng masü saka tashidak wara tamajung mapang asenoki telangzüba agütsüba tongtipang yimya ka lir ta amanger," ta Kilmaurs nung aliba Maxwell Church nungi Rev. Nathan Owens-i ashi.

"Tashidak wara nungi nüburtem jenbua yutsütsü mechi sorkari totuyuba agütsüba yimyatema aika arogotemi inyaka arur. Arogotemi parok ya COVID maliba tentet nung shilem ka ta sayutetogo," ta Aberdeen nung aliba Grace Baptist Church nungi Pastor John William-Nobel-i ashi.

Facebook nung cartoon ka mechi Algeria Khristan ka tepuokdak ayu

Tizi-Ouzou, Tsüklai/February 02 (Agencies): Küm asem tejakdang Khristan kati Islam nunger putir indang cartoon ka dangar nungi ngua pa indang Facebook nung post süja liasü aser January 20 nü sepaitem par kidangi arudang pai iba tatalokba züngzünga bilema meliasü.

Tasüngji tanur pezü tebu arishi küm 43 tain Khristan ka ya Muhammad mezüngmeshiba mechi Algeria nunger ozüng kübok küm pongu tepuokdak ayutsü obendang agütsü.

Oran nungi anüdoklen mile 19 pilar El-Aiyaida nung an metsür Hamid yagi 2018 küm pa indang Facebook page nung cartoon ka ya tanaben lemsatepba sülen ketdangsür nungi osang kecha mangashi, ta Mediterranean tzükum nung Algiers nungi anüolen tsütsüi mile 250 shi orr Oran nung aliba Oratoire Church indang pastor, Rachid Seighir-i ashi.

"Asenok aser par kibong atema ibai timtem ka lir. Body of Christ nung züngsem ka shirangdang temang ajunga kangshir. Adianu Hamid-i pa indang Facebook account nung iba cartoon ya angudang pai kecha memeteti liasü. Iba otsü ya küm asem tejakdang atalokba lir, aser tang ang temai adoker, koba agizüksü tasak," ta Pastor Seighir-i ashi.

Hamid'er tanur pezü ya arishi küm 6, 4, 3 aser ita asem ka lir, aser pa kinungtsü kanga shisabulur, kechiaser par tanur ya ka kangasa mejungi shiranger, ta pastor-i ashi.

January 20 nü sepaitemi Hamid ya asüngdangyatsü atema menur anir ao aser chiok, saka pa ki atongba mapang phone ajanga pa ano tanaben meyipa arutsü ashi, ta osangtem ajanga ashir. Pa kisüng rataseta meyipa ao aser paonungji tepuokdak ayu.

Tasüngnep (January 21) okatsür ka, Pastor Seighir aser

danga Khristan tem Oran Province kübok Arzew nung okadak ken o angatsü atema pa meina anepdang 11:00 ako meta ao.

Algeria indang cybercrime unit nung inyaker kati 2018 küm pai indang Facebook nung Mohammad indang noksa inokba screenshot ka amer pa dang asüngdangya asü, aser prosecutor-i pa ya Muhammad mezüngmeshiba atema penal code indang Arrla 144 kübok küm pongu tepuokdak ayutsüla, ta ashi.

Pai dang mepishira temerenshi ajemtsütsü lenmang lir, ta Hamid indang okatsüri Morning Star News dang ashi.

2017 küm Algeria nung obendanger kati Khristan ka pa indang Facebook page nung cartoon agi Islam nunger temolung yirutsüba yong küm pongu tepuokdak ayutsü obendang agütsü saka küm ka dang ayu. Algeria north tsütsü Wilaya de Bouira nung theater

ANOGO ABEN TSÜNGREM DEN

Tsüngremi sarasadem angashir T. Mapa 12:12-17

Aser Peteri kechi koda Kibubai pa tsüngden chiodak nungi aniteta anir aru aji pai ashi. T. Mapa 12:17

Tsüngremi tesüngmangtsü tulu inyaker. Peteri pa medemertem kishi shibanger pa chioktsü asoshi Tsüngrem dang mepishiba memeteti liasü. Parnok inyaktettsübaji ibaji dang liasü. Parnok teyari kecha maka liasü anungji parnoki mapa ajakji Kibubai dang inyaktsü nüngloktsü. Telangzübaji Kibubai parnok süngmangdaktsü. Parnok sarasadem langzütsü parnoki meimlai liasü. Parnoki aibelenang atet; parnoki Tsüngrem kanga tila ka kümdaktsü.

Asenok ajaki iba shidak sarasademba angatettsü nüngdaker. Asenok ochi Tsüngrem shibai asenok dang meimer, Pa dang sarasadem. Asenoki Pa rongsen asüngdang shibai ajak inyaktsü akoker. Yimya agi aseni akoktsü mapa tashi dang Tsüngrem dangi abentsü asenoki bilemer. Tsüngremi asenok nem tashi, sempet aser akoktsü tashi agüja lir.

Asenoki tasü ita Tsüngrem chuba menden dangi oa tamakoktsü mapa asoshi asüngdangtsüla. Aji kodang asenok tamang shidakba pranga kümdar inyaktettsü akok. Idangji asenoki Tsüngremji tulu aser atangji lir ta motettsü. Iba yagi Kibuba peladaktsüba dak alaka tanga mali.

Asenoki ibai talisa arogo mapa nung, mission mapa nung bilemtsü tenüngdaktsü. Asenoki koba tamakoktsü ta bilemer aji inyaktsü Tsüngrem dang sarasademdir, idangji asenoki Tsüngrem den ajak takoktsü ta angatettsü.

Takoksang Tsüngrem, mapa tulu inyaktsü Na kanga tila ta bilemba asoshi onok dang tai tokang. Ne dang tasü ita ajatsü aser temulung alemtsü Ne Tanela ajanga yariang. Amen.

actor arishi küm 33 tain Samir Chamek dang senchi sen \$900 achi aser küm pongu tepuokdak ayutsü obendang agütsü.

Muhammad indang cartoon tem ya pa indang Facebook page nung lemsaa liasü.

July 31, 2016 nunga Arrla 144 kübok Slimane Bouhafs pua liasü, shibai Facebook nung Islam ya tiazü ta shia liasü. Bouhafs ya 1997 küm Islam nungi Khrista dangi meyip aser 2006 küm tzü tzüsen. Pa ya küm pongu tepuokdak ayutsü aser senchi sen \$900 achitsü obendang August 7, 2016 nung agüja liasü. Iba sülen pa dang senchi achiba adok aser tepuokdak küm asem dang ayu.

Arrla 144 ya international law nung aibelen ka lir, ta human rights organization temi aitsür. Democracy busemba telok, Freedom House ajanga agütsüba report, "Policing Belief" nung, Khristanpur merenshitsü atema iba arrla ya kanga amshir aser iba ya

ajanga police aser obenanger nem par sünütsü südaktsür, ta shia liasü.

Pei temeden amshiba mechi Algeria nung nisung 90 jungnüa tepuokdak yua lir. Ken o ya timba Facebook post tem nung ajemdaker benoker, ta National Committee for the Release of Detainees (CNLD) ajanga ashir.

Muslim nunger nütsüng yongsük shilem 99 aliba linük, Algeria nung Islam ya sorkari melaba tamangba yimsü lir. 2000 küm nungi Algeria nunger Muslim temi Khrista dangi meyiper. Par linük nung Khristanpur ya 50,000 shi alitsü ta ketdangsürtemi ashi, saka dangari iba dang anasü agi timba alitsü, ta ashir.

Khristanpur busemba tentet, Open Doors ajanga Khristanpur alitsü atema tamajungtiba linüktem asadangba 2021 World Watch List nung Algeria ya jenjang 24 buba nung lir.

OLONG PAITEP # 5713

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN		LANGTSÜNGLEN	
1. Anenzükdak ki	- (5)	1. Reprangdaksü	- (4)
3. Asür mangyimba	- (5)	2. _ _ _ ur	- (3)
5. Temulung nung shisadang	- (5)	4. Kiojen yangludak	- (6)
8. T _ _ _ lu	- (3)	6. _ _ _ _ _ ait	- (7)
10. Takdang temalen	- (9)	7. Nagaland nung ayong ka	- (5)
11. Tesa _ _ _ a	- (3)	9. Küm kasa purtem	- (5)
13. Ajungbena temulungjang	- (5)	10. Tetsüng tajemtdak	- (6)
tongtonglatsü atu	- (5)	12. _ _ _ _ adenshi	- (4)
15. Tejen lai nung tesayur	- (5)	14. Tsünösenbongtsü adokdak	- (3)
16. Tsüngsak-mopung	- (5)		

OLONG PAITEP # 5712 TELANGZÜBA

TIPIEN :	LANGTSÜNGLEN :
1. Kasa, 6. Rangben, 7. Mait,	1. Khu, 2. Sükak, 3. Onük, 4. Oba,
9. Poktet, 11. Ati, 13. Atasa, 16. Rür,	5. Anü, 6. Ratet, 7. Mozü, 8. Ita,
17. Rajang, 20. Lanu, 24. Nüngjem,	10. Tar, 12. Tinu, 14. Salem, 15. Aja,
25. Sura.	18. Anünü, 19. Taju, 21. Ano, 22. Onü,
	23. Kua.

Agüja aliba noksa nung meputepi aliba bushiang



TANÜBO NAI LANGZÜANG

Q. Koba putu nung Mafia tenzük?

A. 17th century

B. 18th century

C. 19th century

D. 20th century

===== (Taruba adok nung onoki langzüksü)

YASHI ADOK TELANGZÜBA : NCC Cadets



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



1. Tentüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

ALIMA NUNG TEPOR TAJUNG TIBA
TETSÜRTEM: JANUARY 2021

- | | | |
|------------------------|---------------------|------------------------------|
| 1. Yael Shelbia | 12. Gal Gadot | 23. Taylor Swift |
| 2. Emilia Clarke | 13. Halle Berry | 24. Nathalie Emmanuel |
| 3. Beyonce | 14. Emma Watson | 25. Selena Gomez |
| 4. Bella Hadid | 15. Meghan Markle | 26. Kate Moss |
| 5. Adriana Lima | 16. Charlize Theron | 27. Catherine Zeta-Jones |
| 6. Margot Robbie | 17. Chrissy Teigen | 28. Naomi Campbell |
| 7. Aishwarya Rai | 18. Priyanka Chopra | 29. Alessandra Ambrosio |
| 8. Ariana Grande | 19. Blake Lively | 30. Emily Ratajowski |
| 9. Angelababy | 20. Hannah Jeter | 31. Jasmine Tookes |
| 10. Scarlett Johansson | 21. Emma Stone | 32. Selita Ebanks |
| 11. Mila Kunis | 22. Rachel McAdams | (Maneni asüing adok nung...) |

SUDOKU # 5754

TELANGZÜBA # 5753

5	6							2	7	6	9	4	1	3	5	8
8	1					5	4									
		2	8	3	5		7									
	2	6		9		8		5								
		9	5			2		6								
1		8	3			7	9									
	8	5					6	9								
		1	4			3	8	2								
2	3	4	9		6		5									

OJANG LUTEP # 5301

- IMALA :
- NGNU :
- KAAITI :
- MEMDABILENGI :
- AKSINYAR :
- ENSÜL :
- STEÜ :
- NANUNGG :
- AASAS :
- LEMTEBITER :

OJANG LUTEP TELANGZÜBA # 5300

PEI METETBABA KECHA MAKÄ SERNUNG TANGAR
MASHIMALU TELATETSHIA JEMBIA SENZÜR

TAN HOPTA ATEMA - KOMA SÜLA ?

Q. Nagaland nung COVID-19 vaccine ya taginür ajak nem angati agütsü nunga koma süla ?

Olong 20 shi nung February 05, 2021 tashi nung iba telangzuba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsüsü.



Jalalabad kübok tehsil office nung mangatettep adokba sülen SAD tir aser taoba Punjab Deputy Chief Minister Sukhbir Singh Badal, Akali pusemertem den külemi mener longkak aiba noksa nung angur.

Pua aliba aluyimertem mechiok tashi sensak masemtsü: SKM

New Delhi, Tsüklai/February 2 (Agencies): Police aser administration-i merernshiba aser pua aliba aluyimertem mechiok tashi sorkar den sensakem kecha makatsü, ta Samyukt Kisan Morcha-i Mongolbarnü ashi. Sangdong ka ajanga parnoki ashiba agi, tenokdangba tali agütsüba, kong ongken tali atuba, lenmang nung kojat inoktsüba, merang inzü agi atsü atsüba, lenmangtem shibangtsüba, internet service shibangtsüba aser BJP-RSS

züngsemtemi tasa asar longka aitba sentong timtem agütsüba amala densema lir aser item ajak ya sorkar, police aser administration-i aluyimertem anema jenjang agibatam lir.

SKM-isa, longkak aitba tesem nung internet service mapang shia shibangtsüba aser aluyimer inyakyim dak sendakba nung Twitter accounts shibangtsüba ya democracy anema lir, ta ashi. Sorkari Twitter dang aluyimertem longkak aitba dak sendakba nung osang tai

prokshiba atema handle aser post 250 shibangtsütsü ateam asüngdangba sülen Hombarnü Twitter-i account aika shibangtsüogo.

"Sorkari state balala nungi longkak aitba sentong pusemba tsübur ama reprangteter," ta Samyukt Kisan Morcha (SKM)-i ashi. Aluyimertem shirkot timba Punjab, Haryana aser Uttar Pradesh nungi lir parnoki canter indang aluyimba ozüngtem anema longkak aita arudar.

(Maneni tapak 10 nung...)

CAA benoktsü atema ozüng teyangludak lir

New Delhi, Tsüklai/February 2 (Agencies): Subordinate legislation dak sendakba nung Lok Sabha aser Rajya Sabha committee-i Citizenship (Amendment) Act, 2019 frame asütsü aser benoktsü atema April 9 aser July 9 ta mapang atsülangtsüba sülen BJP-i aniba central sorkar nem Citizenship (Amendment) Act, 2019 atema mapang timba agütsüogo.

"Citizenship (Amendment) Act, 2019 (CAA) ya 12.12.2019 nü sangdong aser 10.01.2020 nung benokogo. Citizenship (Amendment) Act, 2019 (CAA) kübok ozüngtem tang teyangludak lir. Subordinate Legislation dak sendakba nung Lok Sabha aser Rajya Sabha Committee temi Citizenship (Amendment) Act, 2019 (CAA) kübok ozüngtem yanglutsü atema 09.04.2021

aser 09.07.2021 tashi mapang atsülangtsüogo," ta Union home ministry sangdong ka ajanga metetdaksü.

Mepetmesü aliba CAA ya Pakistan, Bangladesh aser Afghanistan nung rishikangshia aliba Muslim nunger masürtem nem India lisopur jenjang agütsütsü atema küm ana tejakdang Parliament nung agizük. Iba sülen linük kübok tesem balala nung act anema longkak aitba sentong aika ayongzüka agiogo. Tir-i iba act ya December 12, 2019 nung agizükogo.

CAA nükjidongji Pakistan, Bangladesh aser Afghanistan nung Hindu, Sikh, Jain, Buddhist, Parsi aser Christian tem shirkot rishikangshi tia nung lir parnok nem India lisopur jenjang agütsütsü atema lir.

Item loktitem nungi shirkot rishikangshiba ajanga

December 31, 2014 masüdag India-i aruogo, parnok ya ozüng alema India-i aruba nisung ta mezüngshitsü saka India lisopur jenjang agütsütsü.

Parliament nung CAA agizükba sülen linük ajunga nung longkak aita liasü. CAA anemertemi ashiba agi, CAA nung onüktem ajanga tamangba yimsü dak ajemdaker telok kar anema inyaker koba linük temzüng ozüng anema lir. Parnokisa CAA den National Register of Citizens ya India nung Muslim nunger dak rangloker benokba lir, ta ashi.

Ajisüaka Union Home Minister Amit Shah-i CAA anema iba taittsüba magizük aser ashiba agi iba ya yimden yimsütsüba tsütsü ajangzütsü atema inyakba lir. Paisa, iba act ajanga India nunger shinga lisopur jenjang mesamatsü, ta ashi.



Patna, February 2 : Mongolbarnü Patna nung Bihar Assembly speaker Vijay Kumar Sinha den deputy CM Tarkishor Prasad na budget session matong tsüngda senden ka nung shilem agiba noksa nung angur.

TDP Andhra tir Kinjarapu apu

Hyderabad, Tsüklai/February 2 (Agencies): Andhra Pradesh kübok Srikakulam district nung police temi Mongolbarnü taoba minister aser Telugu Desam Party state unit tir Kinjarapu Atchan Naidu puogo. Pai anogo ana tejakdang Nimmada yimtsüng nung YSR Congress lenir ka amokmerenba atema apu.

Police temi Tekkali assembly constituency MLA Atchan Naidu'er ki anepdang meita ao aser pa apu. Parnoki Kotabommali police station nung pa dang ghonda ishika ken o ashishiba sülen nikongtsütsü local okadak kati anir ao.

Okadak ajanga TDP lenir ya anogo 14 judicial custody nung ayutsü tetuyuba agütsü. Iba sülen pa Srikakulam district jail-i anir ao. Pai anogo ka ana tsüngda bail atema temepishiba benoktsü imlar.

YSR Congress party lenir sang yagi ashiba agi, Atchan Naidu-i par party indang sarpanch candidate ka amokmeren aser Nimmada nung pa indang nomination agintsü ashi.

Kasa mapang nung Atchan Naidu kinungtsü Vijaya Madhavi-ia sarpanch mapa atema nomination benokogo aser YSRC lenir yagi par adianu

Kinjarapu Appanna kasa mapa atema shimogo.

Appanna-i ashiba agi, pa nomination maginra lendong atoktsü ta shia Atchan Naidu-i pa amokmeren. Ajisüaka TDP lenirtemi ashiba agi, Atchan Naidu-i election nung metokteptsü atema Appanna mesüzütsü merang.

Honibarnü nomination atema tatembangbuba anogo, TDP aser YSRC lenirtem Nimmada nung mangatettep adoka liasü. Kotabommali police-i Atchan Naidu densema nisung 22 anema ken o benokogo.

Atchan Naidu apuba sülen TDP tir aser taoba chief minister N Chandrababu Naidu-i, YS Jagan Mohan Reddy-i aniba sorkar aitsüogo.

Pai ashiba agi, YSRC lenirtemi yimjung nung aliba Srikakulam, Vizianagaram aser Visakhapatnam district tem nung tashiyim amshitsü meranger.

Paisa, Tekkali assembly constituency nung YSRC in-charge Duvvada Srinivas-i anir party pusemertem intong, kotari aser bu bener arua TDP züngsemtem amokmeren, ajisüaka police temi pa anema ken o kecha mebenok saka teyazü kuli ka dak ajemdaker Atchan Naidu bo puogo, ta ashi.

India Defence atema tanga linük dak dang metaloker melitetsü: Rajnath



Bengaluru, February 2 : Defence Minister Rajnath Singh-i, HAL indang tanabuba LCA Production Line lapokba sentong nung o jembiba noksa nung angur.

Bengaluru, Tsüklai/February 2 (Agencies): Defence Minister Rajnath Singh-i Mongolbarnü, linük defence atema tanga linük dak dang metaloker melitetsü, ta ashi. 'Aatmanirbhar Bharat Abhiyan sentong kübok India defence manufacturing capabilities ajungkettsü merangdar, ta Hindustan Aeronautics Limited indang tanabuba LCA-Tejas production line lapoktsüba mapang Singh-i ashi.

"Defence atema India tanga linük dak dang metaloker melitetsü," ta pai ashi. Singh-i ashiba agi, Tejas ya India nung yangluba dang masü saka lenla aika nung bendanglen yangluba dang nungi tajungba aser dalangba lir.

"Linük aikati Tejas alitsü jangraba lemsatepogo. India-i küm ishika tsüngda defence manufacturing dak sendakba

nung sen lakh crore 1.75 intoktsü," ta minister-i ashi.

Sen crore 48,000 alang tenangzüktepba yanglur aliba kübok Indian Air Force nem Tejas LCA 2024 küm March ita nungi agütsü tenzütsü aser tayimtsü 83 magütsüma tashi küm nung tatimtsü 16 shi agüja alitsü, ta HAL Chairman & Managing Director, R Madhavan-i tawa ashi.

Madhavan-isa, Tejas alitsü atema jangraba linük aikati lemsatepogo aser taruba küm ana tsüngda bendanglen nungi order arutsü imlar.

Ato Kilonser Narendra Modi lenisüba kübok Cabinet Committee on Security (CCS)-i, January 13 nü Indian Air Force jenjang ajungkettsü atema sen crore 48,000 intoka Tejas Mk-1A variants 73 aser LCA Tejas Mk-1 trainer aircraft 10 HAL alizütsü telemteba agi.



Afghanistan north tsütsü Kunduz province indang yimtiba, Kunduz city tesülen February 2, 2021 nü khatepba sülen Afghan security force züngsemtem security checkpoint nung nokdaka aliba noksa nung angur. Mongulbarnep Kunduz yimti tezülen khatepba mapang sepai pezü aser telungpur asem asü, ta ketdangsürtemi ashi.

Pearl tepsetba ken o nung aija alisang Pak Govt Safe House-i belener ao

Lahor, Tsüklai/February 2 (Agencies): Pakistan Supreme Court-i Mongolbarnü, 2002 küm America nunger osangbener Daniel Pearl tepsetba ken o nung aija alisang government safe house kati anir aotsü atema tetuyuba agütsüogo.

Ahmad Saeed Omar Sheikh, shiba tasüba agi merenshitsü atema küm 18 tashi tepuokdak yua liasü, pa tanükertemi nüka alitsü aser iba safe house toktsür aotsü memelatsü, ajisüaka kinungsü aser chirnurtem nem pa semdangsü atema temelaba agütsütsü. "Iba ya nüjsobo masü saka nüjiso angutsü atema

jenjang ka asütsü," ta Sheikh tebu, Saeed Sheikh-i ashi, shiba ken o angadanga mapang densema liasü.

Supreme Court-i taoba Brehostibränü Pearl tepsetba ken o nung pa aibelena mali ta obendang agütsüba sülen Pakistan sorkari pa tepuokdak ayutsü atema kanga meranga inyaktepdar aser iba obendang agütsüba sülen Pearl'er kinungertem aser US nung ketdangsürtem kanga mepelar.

Sheikh nem taitok agütsüba agintsü atema Pakistan sorkar aser Pearl'er kinungertemi Supreme Court dang parnok

telemtetba lepa reprangshitsü atema mepeshi ken o benokogo. Pearl'er kinungertem tenüng nung okatsür Faisal Sheikh-i taoba mapang ashiba agi, ken o lepa reprangshiba takok angutsü kangabo timla mali, kechiyong Supreme Court obendanger shibai Sheikh chioktsü obendang agütsüba pa ken o lepa reprangshiba telok nung dena lir.

US sorkari ashiba agi, Sheikh nem taitok agütsüra parnok pa anir aotsü mepeshitsü. Sheikh ya US nung Pearl tepsetba aser 1994 küm India kübok Kashmir nung America nunger ka pur aoba ken o nung aija lir.

China nung police-i Covid-19 vaccine taila yanglurtem apu

Beijing, Tsüklai/February 2 (Agencies): China nung police temi Covid-19 vaccines taila yanglur nisung 80 dak tema puogo, ta state media sangdong ka ajanga metetdaksü. Lunar New Year holiday matong tsüngda China nung nisung million aika nem vaccine agütsütsü aritepa inyakba mapang tang iba ya atalokogo.

Item nisungtem yagi taoba küm September ita nungi vial nung saline tzü inoker Covid-19 vaccines ama yokya liasü, ta Xinhua news agency sangdong ka ajanga metetdaksü.

Police temi Beijing yimti aser Jiangsu o Shandong province kübok yimti aika nung tesem balala meita ao aser Covid-19 vaccines taila 3,000 dak tema nguteta liasü, ta Xinhua-i ashi.

Vaccine kwi ayok iba indang osang tejangja nüburtem nem memetdaksü, saka police temi vaccine yangludak ngutetogo, ta kasa sangdong ajanga metetdaksü.

February tom nung Lunar New Year metenzük tsüngda nisung million 50 nem vaccine agütsütsü nükjidong yur China kidang yangluba vaccine takaratiba nung yanglutsü atema kanga aritepa inyaktepdar.

Iba benjung mapang nüburtem aika senzüsensponger. Ajsüaka takümba

ketdangsürtemi nüburtem dang pei talidak toktsür mayazüktsü ajungshia, tenokdanga kar agütsüba den incentives-a kar agütsüogo.

China nung vaccine agütsüba sentong ajungkettsü inyaktepba mapang clinical trial data tejangja mesayuaka ketdangsürtemi nüburtem dang iba vaccine agiba ajanga kecha timtem madoktsü aser mozük kanga tedangshi lir, ta shia arudar.

State meyang Sinopharm firm indang vaccine nüburtem nem agütsütsü atema ketdangsürtemi December ita temelaba agütsüogo.

2019 küm mesen poktetba sülen China-i wara dak sendakba nung nisung meyirejang aika aitsüogo aser item rongnung olulu osang prokshiba, tashidak keta aliba meimshiba aser tetuyuba sülen manidakertem densema lir.

Kasa mapang nung China nung vaccine dak sendakba nung tang mezüngbuba timtem adoker masü.

2018 küm vaccine manufacturer Changsheng Bio-Technology dang USD 1.3 senchi ashi. Ketdangsürtemi vaccine jenjang majung ta ngutetba sülen senchi achi aser iba ajanga nüburtemi tamang makai aküm.

Myanmar legislator tem 'open-air detention centre' nung yua lir

Naypyidaw, Tsüklai/February 02 (Agencies): Mitkartemi sorkar tashi rakzüka nüburtemi shimteta alir yimten yimsüsür Aung San Suu Kyi densema lenirtem pur anogo ka lir Myanmar indang Parliament züngsemtem noklang aika Mongulbarnü linük yimtiba nung aliba "an open-air detention centre" ka nung yua lir.

Legislator kati Associated Press news agency dang ashiba agi, pa den parliament züngsem 400 shi aliba ya sorkari yanglua aliba ki tuluka telung nung kati ka den jembiteter aser phone ajanga pei constituency den osang agitepteter saka Naypyidaw nung aliba ki ya alemer aotsü memelar.

Police tem ki telung nung lir aser mitkartem tezülen lir, ta pai ashi.

Yangji alir yimten yimsüsürtem ya Aung San Suu Kyi'er National League for Democracy (NLD) nungi züngsemtem aser party tilatem nungi kar lir aser dangaleni anir ao tsüpuba agi amoa motet, ta legislator yagi ashi.

Ano legislator katia AFP dang, la kanga shisabulur aser parnok yua aliba ki ya "an open-air detention centre" ka lir, ta ashi. "Onok temaleni aotsü memelar," ta lai ashi.

Parliament session tasen tenzükba nung linük tesem ajungalen nungi legislator tem adentsü ghonda ishika lia mitkartemi tashiyim agi sorkar atsüngdok. Myanmar nung yimsü tesüdak Suu Kyi'er party



Myanmar mitkari küm ka atema linük amokbangba sülen nüburtemi Myanmar sorkar indang lenir Aung San Suu Kyi indang noksa amer Tokyo nung aliba United Nations University jakdang longkak aitba noksa nung angur. Aung San Suu Kyi densema linük nung yimten yimsüsür aika mitkartemi pua lir.

ajanga takok anguba November election nung ashikülak mapa inyak, ta mitkartemi aitsüba nung sorkari mapa meinyakba mechi iba mera ya agitsüsa akum, ta mitkartemi ashir.

Mongulbarnü NLD ajanga Facebook post ka nung mitkar tashi amshia sorkar atsüngdokba aitsü aser Aung San Suu Kyi, Tir Win Myint aser dangartem pua alir chioktsüla, ta ashi. Aung San Suu Kyi aser tir ya pur ghonda 24 jungogo saka parnok kong aliar memeteter.

NLD legislator temi AFP dang tena ya Naypyidaw nung house arrest nung yua lir, ta ashir. "Onok dang shisabulu masütsü metetdaksü. Ajsüaka

onok shisabulur. Parnok kidang aliba noksa danga angu nungbo onok anisüngzüktsü," ta legislator kati pa tenüng memetetdaksüi ashi.

Mitkartemi General Min Aung Hlaing nem tashi agütsüogo aser küm ka atema state of emergency benoka lir. Hombarnü menur office of the commander-in-chief ajanga cabinet minister tasentem tenüng metetdaksü. Züngsem 11 aliba cabinet nung mitkar tanishir, taoba mapang mitkar tanishir inyaka alir aser taoba General Thein Sein-i aniba sorkar nung adviser inyaka alirtem lir.

Myanmar nung yimti tulutiba,

Yangon nung Mongulbarnü yimti-yimtung akhi dang tesüngjemba liasü saka taxi aser bus tem shidak senzür aser sepai tali yokba meliasü.

"Onoki temolung masüba sayuner. Saka Amay Suu (Ojala Suu) parnok kabu nung lir. Onoki kecha meinyaktet saka tangbo ajem ajema alitsüsa akumer," ta taxi driver kati Mongulbarnep AFP dang ashi.

English oshi nung adokba Myanmar Times osangkaket nung tongtipang osangji state of emergency ya liasü, saka sorkar meyang osangkaket tem mezüng tapak nung Hombarnü National Defense aser Security Council senden amenba indang

noksatem sayua liasü, kong khen atema shimteta aliba Tir Myint Swe aser Min Aung Hlaing nungertem mitkar lenirtem den külemi dena liasü.

1962 küm nungi tenzüka mitkartemi ozüng tesashi amer yimsü asüba aser linük balalai senzüka yuja aruba nungi tanemi melenshia aruba mapang Myanmar nung mitkari sorkar atsüngdoker alitsü.

Mitkartemi iba mera agiba ya ozüng agi melaba lir aser 2008 küm yangluba constitution shilem ka nung national emergency mapang sorkar amokbangtsü mela lir, ta parnok ashir.

Ibai Aung San Suu Kyi atema taoksatsü mapa ka liasü, shibai linük democracy tsütsü anitsü merangba mechi küm aika kidang pua ayu aser 2015 küm election nung lar party-i takok anguba sülen lenir akum.

Aung San Suu Kyi pua ayuba mapang lai mitkartem anema ola adoka liasü. Saka la yimten yimsüsüba nung tetsüng ajemokba sülen mitkar tanishirtem den külemi inyaksüsa akum.

US Tir Joe Biden-i Myanmar nem tenokdanga tasen agütsütsü amokmerenogo, koba Obama administration mapang agiena liasü, kong Bide ya tatong tir liasü.

Mitkar mapa ya linük democracy dangi aoba nung teka sangshiba lir aser Washington-i tenokdanga tanaben agütsütsü nunnganga mali, ta Biden-i ashi.

**GOVERNMENT OF NAGALAND
DIRECTORATE OF YOUTH RESOURCES AND SPORTS
GOVERNMENT OF NAGALAND**

NO.DYRS-SPORTS-KISCE(Manpower)/14/2020

Dated Kohima 2 February 2021

Advertisement

The Sports Authority of India (SAI) is setting up new Sports Academies at Various locations across the country to nurture the best talent of the country identified through Khelo India State Centre of Excellence Schemes (KISCE).

In order to lead these Academies the Department of Youth Resources and Sports invites application for eligible citizens of India or filling up the post of the following on contract basis for a period of 1 (one) year.

Sl	Place of Posting	Designation	Number of Post	Salary
1	KISCE Kohima	Nutritionist	1	Rs 60,000-80,000 /- p.m

The criteria and Norms for application to the said post can be downloaded at State Portal link www.nagaland.gov.in and www.dyrs.nagaland.gov.in and submit their documents to KISCEKOHIMA@gmail.com on or before 17th February 2021.

**Sd/-
(AKUMLA CHUBA), NCS
DIRECTOR**

Issued by DIPR

Office of the
**Mokokchung Senso Mungdang
TENÜNGSANG AGÜTSÜR**

Mokokchung Senso Mungdang ajanga Shri. Imnasowa Kichu, Peon ATI Office Kohima, pei tenzüka wadang nung nendaka aser meranga tenzüka ajiteta, 72nd Indian Republic Day 2021 anogomong nung Governor's Commendation Certificate Award anguba asoshi konang tetushi agütsür.

Tarutsü anogotem nübur tenzüka wadang nung Tsüngremi anema aliba den arishi talang moajang ta Senso Mungdang sarasadem.

**Sd/-
Temjenzülu Lkr
Mendenbuba**

**Sd/-
Imnawapang Kichu
Tongti Zülur**

ASLB SANGDONG

ASLB-i achaayanga agiba Arangtet Tatidang Post Graduate Diploma Tenren (PGDT) Luchii, 2020 tashi nung renema, marks timtiba angubayim (Merit wise) nung yamai sangdonger.

1st Division : Roll No. 26, 1, 38, 37, 15, 7, 31, 8, 18 & 23

2nd Division : Roll No. 22

Temetetsü : Marksheet Tsüklai 4-15, 2021 tsüngda tabeni arutsü sangdonger.

**Sd/-
Rev. Prof. Rongsen Lkr
Convenor ASLB, AC**

**Sd/-
I. Temjen Tzüdir
Secretary ASLB, AC**

WANTED DRIVER

Past Experience 5 years
Contact No : 8119886799 / 8729857447

Tanurtem atema Pokemon Kids TV lapoktsüogo



New Delhi, Tsüklai/February 02, 2021 (Agencies):

Pokemon Company-i YouTube sabang nung "Pokemon Kids TV" ta nüngja agütsür live channel tasen ka lapoktsüogo. Iba channel - Pokemon Kids TV ya tanurtem atema alakteta lapoktsüba sabang ka alitsü.

Company-i ashiba ahi, iba YouTube channel nung English oshi indang video tem dena kor, koba India densema Asian market tem atema bendanga yanglutsü.

Iba channel melapokdang/ metenzükdang, alima ajunga nung Pokemon franchise achaayangba Pokemon Company-i Japan nung tila tanurtem atema kasa live channel sayudar. Company-i ashiba agi, tarutsü anogotem nung tanga Asia linük nung iba tasa atsülangtsü aser region-

specific content atema yanglutsütsü sentong lir.

YouTube - Pokemon Kids TV nung tanurtem atsüa arutsü atema Pokemon sing-along videos, nüngtugu nursery rhymes aser Pokemon sapur tanurtem tsüngda tangazükba lidaktsütsü asoshi educational content dena lir.

Iba channel nung nüngtugu nursery rhymes rongnung 'London Bridge is Falling Down,' 'Old MacDonald Had a Farm,' aser 'Winter Wonderland' dena lir. Pokemon Company-i ashiba agi, iba YouTube channel nung quiz series dena lir. India aser tanga Asia linük balala nung tanurtemi iba Pokemon Kids TV channel ajanga dancing-tunes talisa 'If You're Happy and You Know It' aser tanga aika angutsü.

Iba maparen dak sendakba nung, Pokemon Company, Representative Director aser COO (Chief Operating Officer), Takato Utsunomiya-i ashiba agi, tesüiba küm ishika tejakdang nungi video content atema takhangba renloka arudar aser company-i Japan nung dang masü saka tesem balala nung iba channel atsülangtsüner.

"Tarutsü nung Asia linük balala nung iba tasa atsülangtsü aser tanga oshi nung region-specific content yanglutsütsü asoshi onok sentong lir. Iba channel ajanga tanur timba atsüa arura onok kanga dang pelatsü," ta Utsunomiya-i shisem.

Iba channel lapoktsür sülen nungi, Pokemon Kids TV YouTube channel nung subscribers 25, 000 dak tema kümogo.

6,000mAh Battery aketba Poco M3 sayaogo



New Delhi, Tsüklai/February 02, 2021 (Agencies):

Nüngtugu Poco M2 smartphone den tatongtep ama, Mongolbarnü India nung Poco M3 sayaba sangdongogo. Iba smartphone ya virtual sentong ka ajanga sayaa aser January 09, 2021 (Mongolbar) nungi tenzüka iba smartphone ayoktsü.

Poco M3 smartphone ya variant ana nung 2020 November ita teshimtet market tem nung mezüng sayaa liasü. Poco sapur atema osang tajung kaji, India variant nunga kasa specifications aser storage model ana nung angutsü.

India nung Poco M3 - 6GB + 64GB jenjang sen 10,999 aser 6GB + 128GB storage variant jenjang sen 11,999 alitsü. Customer temi smartphone ya Power Black, Cool Blue aser Poco Yellow sentsü mashi ka shima alitetsü.

February 09, 2021 nü anüngdang 12:00 ako nungi tenzüka Poco M3 ya Flipkart ajanga angutsü. Iba smartphone aliba mapang, Flipkart users temi ICICI Bank credit card ajanga sen 1,000 instant discount angutsü akok. Iba offer ya ICICI Bank credit card nung EMI transaction densema lir.

Specifications tsütsü reprangdangra, Poco M3 - India variant ya taoba küm November ita tanga shishilembadak anguba ama variant kasa alitsü. Iba smartphone nung 6.53-inch full-

HD+ (1,080x2,340 pixels) display den 90.34 percent screen-to-body ratio keta lir. Poco M3 ya octa-core Qualcomm Snapdragon 662 SoC den Adreno 610 GPU aser 6GB LPDDR4x RAM ajanga achaayangtsür. Iba phone nung 128GB storage aser Android 10-based MIUI out-of-the-box inoktsüogo. Iba den bendenloksema, memory ulua aginürtemi microSD card ka ajanga phone internal storage ya 512GB tashi atsülanga amshitetsü.

Maneni, Poco M3 tesülen triple camera angutsü. Iba setup nung 48-megapixel primary sensor den f/1.79 lens, 2-megapixel secondary sensor den f/2.4 macro lens aser 2-megapixel depth sensor den f/2.4 lens inoka yanglutsüogo.

Smartphone tejaklen, waterdrop notch nung 8-megapixel selfie shooter ka dena lir. Tesülen camera yagi mode talisa Document mode, night mode, AI scene detection, Google Lens, AI Beautify, portrait mode aser tanga aika support asür. Tanga feature tsütsü reprangdangra, Poco M3 nung 4G LTE, Wi-Fi, Bluetooth, GPS/ A-GPS aser 3.5mm headphone jack angutsü. Iba phone nung battery tasazük 6,000mAh lir aser battery yagi 18W fast charging support asür, koba USB-Type C port (18W charger included in the box) ka ajanga charge sütsür.



Guwahati, Tsüklai/February 02, 2021: Hombarnü Assam health minister Himanata Biswa Sarma-i Guwahati nung foot-over-bridge tasen ana lapoktsüogo. Minister Sarma-isa taküm küm tsüngda Guwahati nung foot-over-bridge tenet talila yanglutsü.

'Men's Player Of The Month Award' atema Rishabh shirgog

New Delhi, Tsüklai/February 02, 2021 (Agencies): Tawa tembangba Test asayamung nung Australia madak takok angutsüsa India team atema tongti shilem agisang, wicketkeeper-batsman Rishabh Pant ya Mongolbarnü, England skipper Joe Root aser Ireland indang Paul Stirling na den külemi ICC Men's Player of the Month award atema nominate süogo.

Player of the Month Awards atema International Cricket Council-i nominee tem sangdongogo, kong küm piyong international cricket indang form ajak nungi tetsür aser tebur cricket asayar tajungtiba jangjateta award agütsür.

Arishi küm 23 tain Pant-i Australia den Tests ana nung asaya, kong Brisbane nung run 89* meyangludang, Sydney nung pai run 97 yanglu aser ibaji ajanga India cricket putiotsü nung otsüsütsüsa India team-i Australia madak iba series alok.

January ita, England nunger Joe Root-i Sri Lanka den Tests ana asaya, kong test anaprongla nung pai run 228 aser 186 yanglua par teloki 2-0 agi Sri Lanka madak iba Tests series

koktet.

Iba category (Player Of The Month Award) nung nominee tasembuba ji Stirling alitsü. Ireland nunger Stirling-i UAE den ODIs ana aser Afghanistan den ODIs asem asayaogo. Iba mapang pai century asem yanglua lir.

Tetsür Cricket asayar rongnung, Pakistan tsür Diana Baig aser South Africa tsür ana Shabnim Ismail o Marizanne Kapp nunger Player Of The Month Award atema nominate süogo.

Baig-i South Africa den ODIs asem aser 1 T20Is ana asaya, kong Pakistan aser South Africa tsüngda ODI series asem asayadang, wicket timtiba agir rongnung la aküm. Asaya asempronlga nungi lai wicket tuku tashi agia lir.

Ismail-ia Pakistan den ODIs asem aser T20Is ana asayaogo. South Africa aser Pakistan na T20I tanabuba nung Ismail-i wicket pungo magidang, ODI series nung lai wicket tenet agi.

Ismail den külem asayar, all-rounder Marizanne-ia Pakistan den ODIs aser T20Is anana asayaogo aser iba mapang

strike rate 110.57 nung lai run 115 yanglu aser Pakistan den ODI series asayadang lai wicket asem out sütsü.

Iba award dak sendakba nung voting inyakyim indang metetdaksüdang, ICC-i, tentet indang Voting Academy nung senior journalist tem, taoba mapang Cricket asayartem, broadcaster aser ICC Hall of Fame indang züngsem kar densema cricket wadang nungi nüngtugu züngsemtemi iba award atema takoker shimtsü, ta ashi.

"Iba Voting Academy yagi parnok indang vote tem email ajanga yoktsü aser vote indang telemsa shilem 90% ayutsü," ta ICC sangdong ka ajanga metetdaksü.

"Iba den bendenloksema, award atema shimer alir asayartem sangdonger sülen, ICC nung züngoksema alir fans temi ICC website ajanga vote agütsütettsü aser parnok indang vote shilem 10 tashi agizüktsü. Takok angur asayar tenüng ajak ita shia tanabuba Hombarñü ICC indang digital channel tem ajanga sangdongtsü," ta kasa sangdong nung shia lir.

ATP Cup tie nungi Nadal tukuogo

Melbourne, Tsüklai/February 02, 2021 (Agencies): Australian Open asayamung tenzüktsü aliba anogo ishika dang anünga lia, Mongolbarnü (02.02.2021) World number 2 Rafael Nadal-i pa terberem nung timtem aliba ajanga Melbourne nung Spain indang ATP Cup tie asayamung nung shilem magitetsü ta osang jangjatsüogo. Rod Laver Arena nung asayamung ayonger team - Australia nungi Alex De Minaur aser Spain indang tie nungi Nadal asayatsü renemer liasü, saka iba asaya metenzük dang Nadal timtem ajanga asaya nungi tukadoktsüsa aküm.

"Terberem nung timtem aliba ajanga, tanü #Melbourne nung @ATPCup indang mezüng asaya nung #TeamSpain aser kü team den masayatsü asoshi lemtet. Brehostibarnü tanüngba asaya nung shilem agitsü imlaa atar," ta Twitter ajanga Nadal-i lemsatep.

Spain, shirnok taoba küm ATP Cup lapokba asayamung final nung tsük, Brehostibarnü par telok Greece den asayatsü terenemba lir aser Febuary 08 nungi 21, 2021 ayonga asayatsü aliba Australian Open metenzük dang, iba tie nung Nadal temang tajungba küm team pur den asayatsü teimla lir.

Nadal atema otongdar kati Reuters dang ashiba agi, arishi küm 34 tain Nadal, shibai taoba küm French Open asayamung final takok ngua Roger Federer

indang 20 Grand Slam singles title menep, pai kangarabo anibelesa/ temang nung timtem magütsüner.

Mongolbarnü, tebur kija asaya atema Nadal melen külem team pur Pablo Carreno Busta asayaogo.

Iba asaya nung Pablo-i Australia nunger J.Millman madak 6-2, 6-4 agi takok angu. Spain team pur Down Under (Australia) tonga aruba sülen, anogo 14 atema Adelaide nung quarantine asür temaba asayartem rongnung Spain nunger Pablo dena liasü.

Anogo 14 quarantine temer sülen, Hokolbarnü Pablo-i Dominic Thiem madak 7-5 6-4 agi takok angu, koba Adelaide indang Memorial Drive Tennis Club nung teloki tena asaya jangratema reprangogo.

*Warm-Up asayamung nungi Bianca Andreescu tukadok

Mongolbarnü, taoba mapang US Open champion Bianca Andreescu-a Australian Open warm-up asayamung nungi tukuogo. La yiruba ajanga küm ka dak tema tennis asaya nung shilem magiteti arur sülen, iba warm-up asaya nung lai tanaben shilem agitsü imlaa liasü. Ajisüaka, world no. 8 Bianca-i ita 15 tashi tennis asaya nung shilem magiteti arur, tang Febuary 08 nungi tenzüktsü aliba Australian Open nung asayatsü terenemba lir.

Bodhbarnü nungi Melbourne Park nung tenzüktsü aliba

Grampians Trophy nung top seed asayar ka ama arishi küm 20 tain Andreescu-i shilem agitsü renemer liasü, saka Australia tonga aruli anogo 14 tashi hard quarantine nung munger sülen, tekümdangtsü meratem agir ama lai iba asayamung nung shilem magitsü lemtet.

"Tesüiba hopta ana tashi quarantine nung munger sülen, court nung tanaben asayatsü maongka anguba atema pelar," ta Bianca-i ashi.

"Team den junga sensaksema sülen, Australian Open atema temulung agüja tan hopta training agitsü nükla nung onoki Grampians nung shilem magitsü lemtet," ta Bianca-i lemsatep.

2019 küm October ita WTA Finals asayamung nung Canada tsür Bianca temekok apilen yirur sülen nungi lai tennis asayamung ka nung danga asaya mali. Flushing Meadows nung tetsür kija final asayaba mapang, Bianca-i Serena Williams tsükdaksür sülen, la timtem ajanga asaya aika nung shilem agitsü maongka mengutet.

Grampians Trophy nung World no. 12 Belinda Bencic ya jenjang temaba nung alir asayar kümogo. Team balala Australia tonga aruba charter plane nung amenertem dak Covid-19 tashidak putetba sülen, hard lockdown nung alir aser training junga magiteter asayartem atema iba asayamung ayongzüktsür.

Directorate of Youth Resources & Sports ajanga metetdaksür

Dimapur, Tsüklai/February 02, 2021 (TYO): Arishi küm 14 tekübok tetsür aser tebur Boxing aser Wrestling den tetsür Football wadang telemsa nung Indira Gandhi Academy, Kohima nung admission agitsü atema selection trial agitsü, ta Directorate of Youth Resources & Sports ajanga sangdong ka nung metetdaksü. Iba selection trials ya Mongolbar

(09.02.2021) anepdang 10:00 ako nung Indira Gandhi Stadium, Kohima nung agitsü.

Tejangrar candidate temi original Aadhar Card, Birth Certificate aser tawa tangokba passport sized photo (copy 2) bener iba tesem yagi arutsüla, ta Directorate of Youth Resources & Sports sangdong ajangasa metetdaksü.

South Africa tour nung Australia masayatsü

Tsüklai/February 02, 2021 (Agencies): South Africa nung coronavirus wara tensa asadanga, asayartem iba lendongbang nungi kümzüka yutsütsü asoshi, Mongolbarnü Australia team-i South Africa Test cricket tour nung shilem magitsü lemtet.

Australia Coach Justin Langer'er telok yagi Proteas den Test asem asayatsü renemer liasü aser iba tour atema tan ita par team pur South Africa-i aotsü tebilemba nung taoba hopta Australia-i squad sangdong, saka South Africa nung virus tasenba ya taoba dang nungi tesashiba lir ta osang angazüka parnoki iba Tour nung shilem magitetsüsa akümer.

South Africa nung nisung million 1.5 jungnua dak iba tesashi wara puteta lir aser nisung 44,000 dak tema iba tashidak mekotteti süogo. Iba continent (Africa) nung Covid-19 ajanga nisung timtiba asüba linük ji South Africa lir.

Cricket Australia interim chief Nick Hockley-i ashiba agi, medical tetuyuba nung anidaka team-i iba tour atema South

Africa-i maotsü lemtet.

"Tang ama tensa tamajungdang, asayartem, teyariteper staff aser nüburtem kümzüka yutsütsü atema Australia nungi South Africa tashi aotsü ya khenyongi tamakoktsü," ta pai ashi.

"Iba telemtetba ya kanga dang shisadanger agiogo aser tang ama mapang international cricket nung maneni shilem agitsü mechi iba tensa ajanga Tour nung shilem magitetba atema onok mepelar. Ajisüaka, iba wara adokba mapang nungi, mezüngbuba nung nüburtem kümzüka yutsütsü asoshi onoki inyaka aruogo aser biosecurity asalentong tajung renema aliyongjia, tangba mapang iba wara lendongbang ya kangasa tetsübuttsü ka lir," ta Hockley-i ashi.

Tang, iba telemtetba ajanga World Test Championship final nung Australia team shilem agitsü teimla tembangtsür, koba captain Tim Paine nükjiding ka liasü.

Test ranking nung India aser New Zealand sülen Australia team tasembuba nung lir.

Puaaliba aluyimertem mechiok.... (Tapak 7 nungi...)

"SKM-i Hombarñü senden nung, police aser administration-i aluyimertem merenshiba manen tashi sensaksem makatsü telemtetba agiogo," ta SKM-i ashiba den sensaksem akatsü atema tang tashi kecha osang agizüka mali, ta shisem.

"Sorkari sensaksem akatsü atema jaoka mali, saka police temi ozüng alema pua aliba aluyimertem mechiok tashi sensaksem makatsü," ta kasa sangdong ajanga metetdaksü. Ato Kilonser Narendra Modi-i Honibarnü party ajak senden nung ashiba agi, sorkari aluyimba ozüng ita 18 atema mebenoki atatsü shidangba tang tashi magini lir aser sensaksem akatsü atema Agriculture minister Narendra Tomar dangi call dang ka asü nung peritsü.

Modi olen dak sendakba nung Morcha-i, parnoki item

ozüngtem agintsü akhanger ta ashi. Aluyimba lokti lenirtemi parnok takhangba nungi matsüshiba sülen sorkar aser aluyimertem tsüngda sensaksem January 22 nü tsükdakatok.

Senden 11buba amenba mapang nungbo taruba senden amentsü atema-a anogo lateta meyuteti tembang, kechiyong sorkaria parnok tamendakdak nungi matsüngshi ita ishika atema iba ozüng mebenoki atatsü atema shidangba aluyimertemi agizükba sülen sensak asemtsü ta ashi.

SKM-i legal tema ka tentetogo aser iba team yagi, nisung samar aser pua alirtem aser gari samar alibattem indang ken o bushitsüngdangtsü, ta Morcha-i ashi. Tang longkak aita aliba aluyimertemi linük ajunga nung February 6 nü highway tem mokdanga ayutsü sangdongogo.

BILEMDANGANG

"Tamachi nisungi shisa akar mapatem ngur menür."